

## 蓮池大師楞嚴摸象記

### 出家父母反拜

大通智勝如來既成佛已，父率臣民頭面禮足，佛見父王頂禮，

涌身高七多羅樹，有人引此，以破予正訛集中父母反拜之辨，因再附於竹窗隨筆。猶恐誦法華經者，但見彼說，不見辨詞，倘爲所惑，爲害不淺。何者？佛言必依於忠孝，而執其僻見，作此逆理敗倫之語，又引經以證，何怪乎世儒謗佛氏爲無父無君也？茲不憚煩，再爲剖析。大通已成佛道，佛者，大千世界三聖六凡之慈父也，其父雖貴極輪王，亦只是四天下之父而已。此何等境界，而蠢爾凡夫，纔墮僧數，便擬如佛，有是理乎？故云：待汝成佛，受父母拜未晚。若言三寶一體者，佛具三十二相，汝今幾相？佛見父王頂禮，涌身高七多羅樹，汝今涌身幾樹？以是較之，云何一體，況涌身虛空者，正是不受父禮。而父王頂禮，無異頂禮虛空而已，而汝猶未悟也，哀哉！